

20
22

ISLA (•) NLINE

Diahuebs 13 Januari 2022

Email: IslaOnline@gobierno.aw Tel: 528-4952

AÑA DI
INVERSION Y
OPORTUNIDAD

ISLA
ONLINE
NOTICIA DI GOBIERNO



Gabinete Wever - Croes II



Prome Minister Evelyn Wever-Croes: "TA RENOBANDO Y MEHORANDO TUR PATRIMONIO DI BALOR HALTO PA NOS LOCALNAN Y NOS BISHITANTENAN POR TIN MAS GOSO DI NAN"

Diahuebs 13 di januari a tuma luga un conferencia di prensa na Eagle Beach den cual Director di DOW Marlon Croes a anuncia cu a completa e prome fase di renobacion di beachnan "Proyecto Beach Zand". Prome Minister di Aruba Evelyn Wever - Croes a splica di e vision di Gobierno pa logra e recuperacion, progreso y bienestar pa henter nos comunidad.


Durante di un aña y mei bayendo pa dos, Gobierno a lanta un comision yama: "Aruba Amenities", den e comision tin representantenan di DOW, DIP, DNM, ATA, Ministerio di Finanzas y Cultura, Departamento di Asunto Economico, Museo Arqueologico Nacional Aruba y ECA. Miembronan di e comision ta dedica atencion na nos patrimonio natural y historico pa asina crea programanan di renobacion di e area y facilidadnan y tambe purba crea oportunidadnan nobo pa nos comunidad.

Eagle Beach, ta un playa cu a haya reconocimiento internacional como un di e playanan mas bunita di Caribe y di mundo. Prome Minister Wever - Croes a splica cu desde gobernacion anterior, a aloca den presupuesto fondonan necesario pa inverti den e trabounan pa saca santo blanco for di sitionan den lama unda ta permiti pa DOW y DIP y DNM.

'Mensualmente mi a haya update di e trabounan y despues di a renoba e beach na Arashi, Boca Catalina, Fishermans Hut un parti, awe nos ta aki na Eagle Beach caminda trabounan ta den nan fase final.'

TRABOU REALISA

Na Eagle un trabou special a wordo haci pa renoba e santo blanco bou di matanan di druif. E santo aki a satura y cambia di color despues di decadas cu tabata tin campamento, y cu



lamentablemente mester bisa cu nos mes a destrui e bunita beach aki. DOW a percura pa haci e area limpi pa awor e Santo Blanco nobo por wordo basha. E cambianan aki ya caba a trece esfera masha bunita y agradabel, especialmente pa tur esnan cu ta desea di bin pasa dia disfrutando di lama y toch sinta den un poco sombra di e matanan di druif of tambe pa esnan cu ta desea di cana den santo blanco haci ehercicio y distrai pa un rato, Premier Wever - Croes a splica.

Continuacion TA RENOBANDO Y MEHORANDO TUR....

'Mi ta invita tur nos ciudadanonan pa experiencia esaki, djis bin cana aki un atardi, mira e beyesa di bahada di solo, gosa di e aire fresco. Trece e muchanan pa nan hunga riba beach. Nos tin beyesanan natural inmensamente bunita.'

Ta hopi importante pa pareu cu ta renoba e patrimonionan pa tambe pone atencion na con por yuda cuida nan. Aruba su playanan ta un habitat natural hopi sensitivo caminda hopi especie ta biba; di e mas grandi cual ta e turtuganan cu ta bolbe tur aña bin pone webo y percura pa nan siguiente generacion, te na esunnan di mas chikito manera; cangreu, soldachi y piscanan. Tambe nos mata y yerbanan di lama y e parhanan cu ta frecuente e areanan precioso aki di nos naturalesa. 'Pesey laga nos tur sea mas consiente cu no ta hende so tin mester di nos playanan, nos tin cu comparti cu e otro especienan tambe di naturalesa', Premier Wever - Croes a expresa.

PAGINA PA CONSCIENTISACION

E siman aki e comision ta lansando tambe un pagina nobo riba e Website di DOW cu lo bay wordo promovi tambe riba Facebook y otro Website y medionan, pa asina crea mas conscientisacion pa e cuido cu nos playanan y tur otro patrimonio natural di Aruba.

'Un naturalesa bon cuida ta di gran balor pa nos local pero tambe pa nos bishitantenan cu ta inverti pa bin pasa nan vacacion cerca nos.'

Finalizando Prome Minister a remarca cu a declara e aña aki como e aña di "Inversion y Oportunidad". Cu e trabounan aki na Eagle Beach a completa e prome fase di e renobacion di nos playanan. Durante e aña aki trabounan lo sigui na otro Playanan y Patrimonionan Natural y Historico; entre otro na Ayo, Casibari y pronto Seroe Colorado y San Nicolas. Cu na

un ocasion mas adelanta lo amplia mas riba dje. 'Berdad nos ta bringando contra e pandemia ainda, pero mes momento nos ta preparando pa Aruba post covid. Esaki riba su mes lo genera mas desaroyo economico y mas entrada,' Prome Minister a conclui.



Prome Minister Evelyn Wever-Croes:

2022 TA E AÑA DI RECUPERACION DI TURISMO

Di un glas bashi di 0% pa un glas mas di mita yen di 72%

Aña 2022 ta e aña den cua nos lo bay mira desaroyonan nobo pa nos pais. E aña, na unda cu ta premira, pa loke ta trata nos turismo, cu nos lo bay yega na e nivel con nos tawata ta prome cu e pandemia. Pa nos turismo, nos ta mira aña 2022 come e aña di recuperacion. Nos a cera aña 2022 cu 1 % menos cu loke a premira. A cera e aña cu 72% di recuperacion mientras cu a premira cu lo cera e aña cu 73% di recuperacion. Esaki ta debi na Omicron y su efecto riba nos turismo.

Prome Minister Evelyn Wever-Croes a duna di conoce cu ta premira den 2022 nos lo recupera mas ainda cu esey pa asina nos bisa cu satisfaccion cu turismo a recupera completamente den 2022. Banco Central a confirma esaki tambe, segun Prome Minister. Nan ta mira e desaroyo cu ta confirma cu nos ta recupera. Tambe pa loke ta trata crecemento economico, nan ta mira esaki hopi positivo pa pais Aruba.

Prome Minister ta enfatisa esaki despues di a tuma nota cu e lider di oposicion, señor Mike Eman ta scoge pa mira e glas mita bashi. Ilustrando su mes na e dicho 'E glas ta mita yen of mita bashi?', Prome Minister a remarca cu manera nos ta interpreta si e glas ta mita yen of mita bashi, nos ta mira tambe e situacion sea positivo of negativo. Ora cu bo ta wak un glas mita bashi, bo ta wak e negativo. Pero si bo ta wak e glas mita yen, bo ta wak e positivo.

Cu e ilustracion aki, Prome Minister a referi e momento cu Covid a dal nos pais, na unda cu nos mester a cera nos fronteranan. Aruba door di esaki a perde tur turismo. E glas cu tawata yen prome cu Covid, a baha full y a keda full bashi. Una bes cu e prome lunanan a pasa y a cuminsa bek, henter Aruba a uni y a traha hunto y hopi duro pa saca nos pais di e pandemia. Especialmente esnan cu ta traha den e sector di turismo, na hotel, restaurant y otro caminda cu ta bin den contact pa sirbi turistanan. Esaki a pone cu poco poco, nos turismo a cuminsa crece.

Sinembargo, Prome Minister ta enfatisa, turismo no a yega ainda na e glas yen manera e tawata ta prome cu e pandemia. Pero si el a yega na mas di mita yen, esta 72% di loke cu e tawata.

"Esaki ta un recuperacion den turismo cu 72%. Mi ta wak esaki hopi positivo y ta hopi gradici na tur esnan cu a logra esaki", Prome Minister a remarca.

Di otro banda, Prome Minister a indica, lider di oposicion señor Eman si a scoge pa mira e glas mita bashi y esaki ta di lamenta. Señor Eman ta scoge pa insulta y cherche hende riba



e veld profesional y den turismo. E ta mira solamente e parti negativo. Mike Eman ta mira cu e glas tawata na 100% y cu a cera e aña cu 28% menos.

"Pero nos tur sa, kico tur e pueblo aki a pasa aden. Ta solamente un hende cu no sa cu tawata tin un pandemia riba e isla aki y riba e mundo aki, por tin un mentalidad negativo asina. Nos a wak turismo na 100% bira te cero y di cero crece bek na 72%. Esaki ta danki na e esfuerzo di cada ciudadano di nos pais.

Ora un hende, manera Mike Eman, ta bisa cu di 100% el a bira 28% menos, ta simplemente un hende cu no ta parce cu e ta biba riba e planeta aki of no ta worry riba loke e pueblo aki a pasa aden", Prome Minister a expresa.

Prome Minister ta di opinion tambe cu e actitud aki di señor Eman ta un falta grandi di respet contra tur nos profesionalnan, esnan cu ta labora den e sector di turismo, e sector di horeca. Esakinan ta personanan cu a core hopi riesgo, a sacrifica nan mes pa yuda pa turismo lanta bek y logra cu Aruba a cera aña cu un recuperacion di turismo di 72%.

Finalmente Prome Minister ta encurasha cada ciudadano: "No preocupa cu esnan cu kier wak e glas mita bashi, 28% mas bashi. Pasobra esakinan ta hendenan cu solamente ta wak e negativo y problema y reto den cada situacion.

Ban ta positivo y wak cu e glas ta mita yen. Turismo tin un recuperacion di 72%. Nos ta wak oportunidad y solucionnan. Laga nos tin un curason hopi gradici pa tur esnan cu a traha duro pa hiba nos turismo den recuperacion. Ban traha cu e mesun forsa, pa di berdad, manera ta proyecta, 2022 ta e aña di recuperacion di nos turismo".

RECUPERACION DI NOS TURISMO

72%
YEN



28%
BASHI



DI UN GLAS BASHI DI 0% PA UN GLAS MAS DI MITA YEN DI 72%

Ban ta positivo y wak cu e glas ta mas di mita yen. Turismo tin un recuperacion di 72%. Nos ta wak oportunidad y solucionnan. Laga nos tin un curason hopi gradici pa tur esnan cu a traha duro pa hiba nos turismo den recuperacion. Ban traha cu e mesun forza, pa di berdad, manera ta proyecta, 2022 ta e aña di recuperacion di nos turismo”.



MINISTER XIOMARA MADURO TA SPERA DI POR LOGRA REFINANCIA E DEBE DI 904 MIYON FLORIN CU ARUBA TIN CU HULANDA PA MOTIBO DI COVID19

E ora lo mester cubri solamente e debe local y e deficit pa por ehecuta Presupuesto pa aña 2022

Minister Maduro ta brinda informacion riba e necesidad financiero den Presupuesto 2022 pa Pais Aruba. E aña aki tin un necesidad financiero total di 1651 miyon florin di cual 1360 miyon ta bay na servicio di debe, 110 miyon ta bay debe local y 291 miyon florin ta di e deficit presupuestario. Den e 1360 miyon florin tin e suma di 904 miyon florin cu ta consisti di e fiansanen 'bulletening' cu Aruba a haci cu Hulanda pa asina por a ehecuta y cubri gastonan di gobernacion di Presupuestonan di aña 2020 y 2021 y tambe pa por a brinda Subsidio di Salario den aña 2020 y 2021. Na april 2022, e 'bulleteningen' aki ta madura. Minister Maduro ta spera di por logra refinancia e debe aki di 904 miyon florin cu Hulanda. Si logra, e ora lo mester cubri solamente e debe local y e deficit pa por ehecuta Presupuesto pa aña 2022.

A CUMINSA NEGOSHA CU HULANDA PA REFINANCIA

Ya for di aña pasa a cuminsa negosha cu Hulanda pa asina por haya refinancia e debe aki haci pa Aruba por surpasa e efecto financiero y economico cu COVID19 a trece cune pa nos Pais. E negociacion mester a ser para, mirando cu mester a warda pa e Gobierno nobo di Hulanda forma. Awor cu e formacion ta tras di lomba, ta spera cu pronto lo por tin un decision pa por refinancia e debe aki di 904 miyon florin cu Hulanda.

LO MESTER BUSCA FONDO PA FINANCIA E DEBE LOCAL Y E DEFICIT

Manera treci dilanti, e necesidad financiero pa 2022 ta consisti di debe internacional, debe cu Hulanda, debe local y e deficit presupuestario. Si logra yega na un acuerdo cu Hulanda pa refinancia e debe di 904 miyon florin, e ora lo mester busca fondo solamente pa e debe local y e deficit, ya cu e debe

internacional ta cubri caba. Pa e ultimo aki Aruba a haya fondo for di Hulanda na september 2021. Pa financia e debe local lo acudi na e mercado di capital local manera a acorda cu Hulanda. E deficit lo mester wordo financia sea via sosten di likidez di Hulanda of busca riba e mercado di capital local. Ta trata di un suma total di 401 miyon florin cu lo mester busca pa por haya ehecuta Presupuesto 2022.

BISTA RIBA Finansa Publico
NECESIDAD FINANCIERO

NECESIDAD FINANCIERO TOTAL PA 2022 TA 1651 MIYON FLORIN PA CUBRI:

- Servicio di debe cu ta suma 1360 miyon florin
 - Debe internacional 346 miyon
 - Debe Hulanda pa COVID19 904 miyon
 - Debe local 110 miyon
- Deficit di 291 miyon florin

PRESUPUESTO 2022
Gobierno di Aruba

BISTA RIBA Finansa Publico
CON TA CUBRI E NECESIDAD FINANCIERO DI 2022?

DEBE INTERNACIONAL 346 MIYON FLORIN	Na september 2021, Hulanda a presta Aruba 523,1 miyon florin pa por paga debe internacional den 2021 (177,1 miyon) y 2022 (346 miyon).
DEBE HULANDA PA COVID19 904 MIYON FLORIN	A cuminsa delibera cu Hulanda pa por refinancia e debe aki cu na april 2022 ta madura.
DEBE LOCAL 110 MIYON FLORIN	Conforme palabracion cu Hulanda, Aruba mester financia esaki riba mercado local.
DEFICIT 291 MIYON FLORIN	Sea via sosten di likidez di Hulanda of riba mercado local.

Pues Gobierno mester busca **1305 miyon** (debe NL + Debe Local + Deficit) pa por implementa Presupuesto 2022.

PRESUPUESTO 2022
Gobierno di Aruba

TUR COMERCIANTE CHIKITO CU TIN KOR MESTER ENTREGA E DECLARACION DI AÑA 2021

E comerciantenan chikito cu tin KOR tin e deber di entrega e declaracion di aña 2021 no mas tarda cu dia 17 di januari 2022.

Pakico mester haci declaracion?

Con pa haci declaracion?

Con mester yena e declaracion?

Kico ta pasa si no entrega e declaracion anual?

Haya contesta riba e preguntanan menciona aki:

<https://www.impuesto.aw/tur-comerciante-chikito-cu-tin-kor-mester-entrega-e-declaracion-anual-di-ana-2021/>

Pa mas informacion por yama 522 7437 of manda un e-mail na boi@impuesto.aw



Departamento di Impuesto ta informa:

NOS SERVICIO
NA CLIENTE
AWOR TA
UBICA NA NOS
OFICINANAN NA
MFA PARADERA
Y MFA SAVANETA
EN CONEXION
CU TRABAONAN
DI MANTENCION
NECESARIO NA
NOS OFICINA
PRINCIPAL

Orario di Servicio
MFA Paradera y Savaneta: 8:00 - 12:00 | 1:00 - 3:00

Por acudi na e ofcinanan aki pa:

- entrega of busca documento;
- busca carchi di persoonsnummer (pa cliente existente);
- haya informacion tocante areglo di pago.





Departamento di Impuesto



NCTVI & INTERPOL Aruba ta informa: E LUCHA CONTRA CRIMEN TA CUMINSA NA NOS FRONTERA; PROYECTO "INTERPOL AT THE BORDER" A DUNA SU FRUTONAN

Pa percura cu INTERPOL por persigui criminalnan y nan pasonan rond di mundo, e ta importante pa mantene un relacion fuerte cu e diferente departamentonan di husticia y demas gruponan di interes, pa e parti di comparti informacion valioso y dialoga riba experticio den maneho di frontera. Control di frontera usando basenan di data di INTERPOL ta duna informacion den tempo real, permitiendone asina e detencion di e criminalnan na momento di control. Paisnan cu ta haci uso di e basenan di data aki di INTERPOL, tambe por usa e informacion aki pa examina nan basenan di data nacional.

Iniciando den luna di November 2021, e sistema di maneho di frontera na Aruba a ser conecta cu e base di data nominal di INTERPOL, cu ta inclui "INTERPOL Red Notice". Esaki ta un solicitud pa e departamentonan di husticia mundialmente pa localisa y provisionalmente detene e persona den cuestion, pendiente su extradicion of cualkier otro accion legal cu mester tuma luga. E tipo di solicitud di "INTERPOL Red Notice" ta wordo publica na e solicitud di e pais cu ta miembro y mester cumpli cu tur e rekisitonan di e constitucion y reglamentonan di INTERPOL. Esaki kiermen cu e "Red Notice" no ta un orden internacional di detencion. Adicionalmente, no ta solamente e intercepcion di hende ta importante, pero tin cu duna importancia tambe na documentonan y paspoortnan cu ta perdi, cu den man di criminalnan internacional y teroristanan ta di balor inmenso. Nan ta haci uso di esakinan pa por traspasa fronternan sin wordo detecta.

Den mannan robes, bo paspoort por ta un arma poderoso! Den diferente atakenan terrorista durante e ultimo decanan, e criminalnan a biaha internacionalmente usando paspoortnan falsifica y invalido pa sconde nan identidad. Un paspoort horta y/of perdi por causa cu;

- Un fugitivo por scapa di husticia
- Teroristanan internacional por biaha for di zona di conflicto
- Rednan di trafico humano por medio di transportacion



entre frontera di e victimanan

Den caso di a perde bo paspoort y nan use pa biaha, bo semper lo por bira victima di "identity theft", unda cu bo paspoort lo por wordo usa pa actonan criminal, como por ehempel, habri un cuenta bancario y usa esaki den e proceso di labamento di placa.

INTERPOL Aruba a lansa e proyecto "INTERPOL at the border" dia 1 di November 2021, unda a conecta Aruba cu e base di data nominal di INTERPOL Internacional y e "SLTD Database" asina conectando cu nos base di data nacional di maneho di frontera.

Den e mision di e lucha pa combati crimen entre frontera, por bisa cu a logra haya rond di 30 diferente "hit" durante e prome dos luna di proyecto "INTERPOL at the border". E obhetivo principal di NCTVI ta pa mantene nos fronteranan sigur, por medio di introduccion di tecnologianan nobo como tambe facilitando e cooperacion entre e diferente agencianan cu ta forma parti di nos departamentonan di husticia.

Den e grafico, por mira e diferente "hit" cu a haya durante e ultimo dos luna, y kico nan ta.

AÑA
20
22

AÑA DI INVERSION Y OPORTUNIDAD

Inversion den bo mes
Inversion den nos economia
Inversion den nos pais

Creando oportunidad pa tur ciudadano!



Gobierno di **Aruba**

| **Aruba mester di nos tur!**



MINISTER ENDY CROES & MINISTER URSELL ARENDS A FELICITA SR. JAMES OCALIA

En conexcion cu e wega di kwartet na papiamento



Diaranson mainta Minister Endy Croes y colega Minister Ursell Arends tabata presente na SPO Brazil en conexcion cu entrega di wega di kwartet.

Sr. James Ocalia ta creador di e wega di kwartet cu ta hiba como tema planta y cosecha. E idea a nace door cu sr. Ocalia cu ta docente y ta duna les di e materia aki ne scol el a ripara cu e kier traha algo cu e studiantenan por uza durante les pa stimulan y pa nan siña mas di mata y berdura cu ta crece na Aruba. Kwartet ta un wega educativo na Papiamento, cu potret y colorido cu e studiantenan por siña hopi lihe. Despues dje presentacion y entrega oficial di e wega di kwartet e mandatarionan a haya e oportunidad pa hunga e wega aki cu alumnonan di e scol.

Durante e bishita e mandatarionan a haya un rondleiding tambe di SPO Brazil door di director sr. Mark Thiel y sra. Ghislaidy

Genser - Angela pa mira con e scol ta organisa, oportunidad y beneficianan cu e scol ta brinda na e hobennan.

E mandatario a expresa cu e scol ta bon hinca den otro e staf ta brinda e ayudo na e studiantenan pa brinda nan un oportunidad pa sigui den bida pa haya un trabou despues cu nan finalisa e scol.

Minister Endy Croes ta felicita creador di e wega di kwartet sr. James Ocalia cu e bunita iniciativa como tambe ta gradici Fonds Kind en Handicap y Stichting Prins Bernhard Fonds Caribische Gebied papa financia y realisa e proyecto aki pa asina tur scol basico y di SPO por haña un donacion dje wega di kwartet. Masha pabien cu e wega di kwartet nobo y nos ta orguyoso di e trabou cu nos hendenan ta haci pa cu nos studiantenan.

Continuacion MINISTER ENDY CROES & MINISTER URSELL ARENDS....





ARUBA TA DECOR PA PELICULA DI NETFLIX



Errol Nayci y Steven Hillenius di Storytellers Film & TV a haci un bishita di cortesia na Minister Plenipotenciario Guillfred Besaril. Meta di e bishita ta pa informa e mandatario di filmacionnan cu lo tuma lugar e aña aki na Aruba pa e pelicula “Sea State 9”. Como cu e storia ta tuma lugar den e mundo di defensa, e filmacionnan ta principalmente na Marinierskazerne Savaneta. Bernd Roelink, hefe di comunicacion di Koninklijke Landmacht tambe tabata presente na e combersacion cu minister Besaril. Sr. Roelink a splica cu Ministerio di Defensa ta contribui na e produccion unicamente den brinda localidad pa e filmacionnan y material y arma pa e actornan. Alabes sr. Roelink a bisa cu e motibo cu Ministerio di Defensa ta duna sosten na e proyecto aki ta pasobra e pelicula ta mik riba hobennan y pesey e por tin efecto bou di hobennan pa pensa riba un carera profesional den ehercito.

Sr. Nayci a splica cu lo tin filmacion na tres lugar, esta Curaçao, Saba y Aruba. E isla di Saba ta decor pa filmacion den selva,

mientras cu na Curaçao y Aruba ta filma na base militar Parera y Marinierskazerne Savaneta. Ta planea pa haci filmacion na Aruba den e prome parti di luna di juli. E pelicula mes ta drey e prome kwartaal di 2023 den cinema y despues riba Netflix. Director di e pelicula ta Bobby Boermans, cu tambe tabata responsabel pa e serie di television “Hoogvliegers”. E proceso pa busca e elenco di actor y actriz nan ta andando y tambe e productornan lo haci uso di actor y actriz nan local.

Minister Besaril a gradici e productornan di Storytellers Film & TV pa e informacion riba e proyecto aki y a bisa di ta contento cu e pelicula aki lo duna un bista di Reino Hulandes, e paisnan cu ta forma parti di Reino y e rol importante cu Defensa ta hunga na e parti Caribense di Reino Hulandes. E mandatario a bisa cu e tambe ta spera cu e pelicula por interesa hobennan Arubano pa sondea e posibilidad di un carera profesional den ehercito di Reino Hulandes.

Departamento di Salud Publico: UPDATE 13 DI JANUARI 2022

Segun resumen di awe 699 persona a recupera y un total di 517 caso nobo di COVID-19 a keda registra di cual 106 ta no-residente. E cifranan aki ta representa un 'Positivity rate' bou di nos residentenan di 62%. E cantidad di casonan activo di COVID-19 pa awe ta 2825 y cantidad di fayecidonan relaciona cu COVID-19 a aumenta na 184 forsa na famia di e fayecidonan. Datos ta ilustra casonan nobo di COVID cu un

averahe semanal di 634 caso pa dia y un averahe di 'positivity rate' semanal di 63% pa dia. Actualmente na Aruba tin 42 persona interna cu of debi na COVID di cual den ICU tin 4 persona y riba piso general tin 38. Na Colombia tin actualmente 3 persona den ICU y ninguno (0) riba piso general.

13/1/2022	TOTAL	RESIDENTE	NO-RESIDENTE
Casonan Nobo	517	411	106
Activo	2825	2415	410
Recupera	26685	23226	3459
Positivo	29694	25821	3873
Morto	184	180	4
Vacuna	85166	-	-
Hospitalisa AUA	42	-	-
ICU AUA COL	7 4 3	-	-

HABITONAN PA KEDA

Saludabel

DEN TEMPO DI COVID-19 Y VACUNACION

MINISTERIO DI TURISMO,
SALUBRIDAD PUBLICO
Y DEPORTE

DVG

VACUNA
PA NOS POR
progresar

Limita uzo di aparatonan electronico!

E uzo di celularnan y otro aparatonan electronico ta afecta momentonan, por ehempel, familiar manera come hunto na mesa; esaki por crea un "individualizacion" of "aislamiento" hopi peligroso. E dependencia na e artefactonan aki por bira un adiccion mesun fuerte cu esun na alcohol of droga. E adiccion aki por crea un desequilibrio kimico den e cerebro cu por genera trastornonan manera depresion, ansiedad, insomnio severo y impulsividad. Si e dependencia aki ta dañino pa adulto, corda con perhudicial e por ta pa mucha. Limita y controla uzo di aparatonan electronico. Pa combati COVID-19 bo mester mantene bo salud y vacuna, ya cu ta comproba cu e vacuna tin un efectividad halto pa proteha bo y evita transmision. Ban uza tur e hermentnan cu nos tin pa caba cu e virus aki na nos isla!

Ami SI
ta vacuna!

Mantene 1.5M
minimo di distancia

Laba man
frecuentemente

Uza tapa boca
paden di tur luga

VACUNA!



Un Feliz Dia

ISLA ONLINE

NOTICIA DI GOBIERNO